



# Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tir\_yimym



tir yimym

TAPAK 8

## Opposition-i shilem magiba Venezuelan election Maduro-i akok

## Troy Cooley India A bowling coach kumogo

VOL. XXII ISSUE NO. 222 (ADOK 222)

DIMAPUR

SANGTENNÜ (TUESDAY)

MONUPII (MAY) 27, 2025

₹ 5.00

## CNCCI-i state sorkar nem tenüingsang agütsür

**Dimapur, May 26, 2025 (TYO):** Nagaland sorkari Urban Local Bodies (ULBs) ajak nung ozüing alema Restrictive Trade Permits agütsüba anentsü aser agüjadoker aliba permits ajak aithitsü lemtet agiba atema tenüingsang tulu agütsür ta Confederation of Nagaland Chamber of Commerce and Industry (CNCCI)-i metetdaksüogo.

"CNCCI ya Nagaland District Chambers 17 tenüing nung tentetba telok lir aser sorkari rongzenketzüing aser terenlok bener arutsü inyakba nung teyariteper tajung ama züingshir.

Sorkar aser shishilembartem tsüingda amalitep tajung ali nung dang asen tejakleni aotsü" ta Media Affairs, CNCCI sangdong ka nung ashi.

CNCCI-i mepishiba ama sorkari mapang shitak nung lemtet agiba ajanga sorkari shishilembartem tebilemtsü atema nendaka bilemba sayur. Iba ajanga sorkar ketdangsübaren nung ajak dendaksüba sayur. Iba ama mapang shitak nung lemtet agiba ajanga Nagaland nung shishilembaba maparen tajungba yangertettsü ta Media Affairs sangdong nungsa metetdaksüogo.

## Assam Congress president atema Gaurav Gogoi shim

**Guwahati, May 26, 2025 (Agencies):** Assam Pradesh Congress Committee (APCC) President inyaktsü atema Lok Sabha MP aser Deputy Leader of the Opposition Gaurav Gogoi shimogo.

AICC president-i Assam Congress president inyaktsü atema Gaurav Gogoi shimogo ta AICC general secretary KC Venugopal-i ashi.

AICC-isa Assam nung working president tasen asem-Jakir Hussain Sikdar, Roselina Turkey, aser Pradip Sarkar nunger shimogo.

Assam Assembly elections agütsü aliba jakdang AICC-isa committee balala atema

chairpersons shimogo. Campaign Committee: Bhupen Kumar Borah, Coordination Committee: Debabrata Saikia, Manifesto Committee: Pradyut Bordoloi, Publicity Committee: Rakibul Hussain.

Gaurav Gogoi ya taoba Assam Chief Minister Tarun Gogoi'er jabaso lir. Pai kümsük asemben tashi Kaliabor nungi Member of Parliament inyakba aru aser 2024 Lok Sabha elections nung Jorhat menden nungi takok angu.

Gaurav Gogoi ya Northeast nung Congress lennir tongtipang ka lir aser state o central jenjangtem nung BJP-i aniba sorkartem anema jembir ka lir.

## Manipur Governor-i lungkak aiterem dang nungi jena ao

**Imphal, May 26, 2025 (Agencies):** Manipur Governor Ajay Kumar Bhalla-i Imphal International Airport nungi Raj Bhavan tashi helicopter ka ajanga aotsüsa aküm.

Imphal International Airport lenmang nung lungkak aiterem paitoktsü atema pai kilometer 4 shi helicopter ajanga ao.

Coordinating Committee on Manipur Integrity (COCOMI)-i tanü agi anogo anabuba lungkak aitogo. Tanü Imphal International Airport-i aoba lenmang nung kaketshirtem dena lungkak aiterem tarensena noktak.

Manipur Governor ya tanü nikongdang 1:30 ako meta Imphal tonga arutsüba liasü aser tanep 11:00 ako meta ka nungi lungkak aitertemi gari lenmang anasa noktaksü tenzü.

Lungkak aitertemi ghonda 3 tema ataaka Governor den majuruteptet. Tanü nikongdang 3:00 ako meta Governor Bhalla-i Raj Bhavan tashi gari ajanga masü saka helicopter ka ajanga ao.

Governor-i helicopter ka nung mener lungkak aitertem dang nungi jena Raj Bhavan-i ao. Lungkak aitertemi mepelaba sayutsü atema timi dang noktaka liasü saka Governor-i ajuruteptsü

melena helicopter nung aobaji tesasatsüka lir" ta COCOMI Women Wing convenor RK Tharaksana-i ashi.

"Pai Raj Bhavan tashi kilometer 4 dang süaka helicopter nung aotsü lemtetba ajanga pai pa aibelen agizükba sayur. Aji ta mesüra pai lungkak aitertem den ajurur lila" ta Tharaksana-isa ashi.

"Governor-i tatok memeshi tashi onoki lungkak aittsü. Yashi nungi COCOMI-i ozüingi melaba ama lungkak aita arur. Security personnel-i tashiyim amshiaka onoki akhangba ama telangzüba mangu tashi iba movement manentsü" laisa ashi.

COCOMI-i Governor dang Manipur nunger dang yimjak nung tatok meshitsü, Chief Secretary, DGP, aser tongti security ketdangsürtem mapa nungi anentsütsü aser Manipur litsü kümzüka ayitsü tenangzükbatem akhangar.

Mahar Regiment sepaitemi journalists amenba Manipur State transport bus nungi "Manipur" ojang agientsü tetuyuba agütsüba anema lungkak aittsü tenzü.

May 20, 2024 nü Ukhrul nung Shirui Lily Festival 2025 osang abentsü atema aodang iba ya atalok.

## Kin 5-i May 29 nü Reservation Policy anema lungkak aittsü

**Dimapur, May 26, 2025 (TYO):** 5 Tribes Committee on Review of Reservation Policy-i September 20, 2024 nü Nagaland sorkar nem Memorandum ka agütsüba atema telangzüba magütsüba sülen April 26, 2025 tashi anogo züingzüka liasü saka iba mapang tsüingda sorkar nungi telangzüba kecha maliba agi parnoki lungkak aittsü osang metetdaksüogo.

May 24, 2025 nü CPO Hall, Chümoukedima nung kin 5

hohotem aser lanur o kaketshir teloktem külem senden amendang bangiemtepba ama kin pungu aliba District headquarters 5 nung May 29, 2025 nü lungkak aitba mezüingbuba shilem agütsü metetdaksüogo.

Iba anogo kin 5-i pei pei district tem nung DC office tashi lungkak aita jajatsü aser Nagaland sorkar dangi Ultimatum Reminder ka yoktsü.

May 29, 2025 nü lungkak aitba sentong nung public ajak,

talisa lanurtem aser kaketshirtemi shilem agütsü mepishir ta Convenor Er. Tesinlo Semy aser Member Secretary GK Zhimomi nati tanü sangdong ka nung ashi.

Küm 48 tashi Reservation Policy mereprangshii aruba aser review committees temi kodanga non backward tribes tebilemtsü onüktem mebilemtsüba anema iba movement nung shilem agütsü ayongzüker ta 5 Tribes Committee on Review of Reservation Policy-i metetdaksüogo.

## Wokha nung Lighthouse School Complex atema senden amen

**Dimapur, May 26, 2025 (TYO):** May 26, 2025 nü Deputy Commissioner Conference Hall, Wokha nung Nagaland Education Project - The Lighthouse (NECTAR) indang senden ka ayonga menogo.

Iba senden nung Advisor to School Education Dr. Kekhrielhoulie Yhome, Advisor to the Chief Minister Dr. Chumben Murry aser Deputy Project Director NEP - NECTAR Avelü Ruho nunger aden.

Senden nungsa Lotha Hoho, Lotha Students' Union, Lotha Eloee Hoho, ali kiburtem aser tanga ketdangsürtem aden.

"Wokha District nung quality education agütsüba rejutem amenoktsü nüngdaker kechiyong Nagaland nung iba district ya kanga tongtipang ka lir" ta School Education Advisor Dr. Yhome-i

ashi.

Iba mapatong shitak inyakba aotsü atema government rules aser directives shitak inyaktsüla. Ali atsünga agiba ajanga khuret balala bentsür arur anungji bangzüing tajung kar agütsüla ta paisa ashi.

Akokba tashi infrastructure aser academic facilities tajungba akümtsü atema meratem agütsü ta Advisor Yhome-isa nangzü.

Advisor to the Chief Minister Dr. Chumben Murry-ia ali kiburtem dang tekaratiba nung mangatettep aliba ken o tem angatetteptsü ayongzü.

Deputy Project Director NEP - NECTAR, Avelü Ruho-i mapatong indang osang lemsatop aser Deputy Commissioner Vineet Kumar, IAS-i district nung sorkar ali kümzüka ayutsü nangzü.

Government Higher

Secondary School, Wokha Principal-ia infrastructure tajung nüngdakba ashi aser paisa NGOs dang amalitep alitsü ayongzü.

Sorkari ozüing dak sendakba maparen inyakba atema pelar aser iba mapatong nung akokba tashi yariteptsü ta Lotha Students' Union President, Lirhonthung Lotha-i ashi.

Paisa contractor tem dang mapa shitak inyaktsü aser ali kiburtem dang terenlok mapa nung tetsükdaksü ajurutsüsa ken o tem madokdaksütsü tayongzüka agütsü.

Lotha Hoho Chairman-ia iba mapatong nung bendanga agüja yariteptsü nangzü.

Tesüiba nung sorkar nem ali tenlartemi ali agütsüba indang otsü metetdaksü aser iba mapatong dak sendakba tebilemtsütem lemsatop.

## Nagaland nung legal infrastructure atema teyari meshir

**Dimapur, May 26, 2025 (TYO):** Principal Secretary for Law & Justice, Y. Kikheto Sema, IAS-i New Delhi nung Union Minister for Law & Justice, Arjun Ram Meghwal den ajurutepogo.

Union Minister Meghwal-i October 22, 2024 aser April 12, 2025 anogotem Nagaland semdangba mapang nangzüka atema iba senden amen.

Kikheto-i Union Minister dang Rule 8(4A) of the Notaries Rules, 1956 kübok Nagaland nung Notary Publics 200 aliba nungi 400 ajungkettsü ayongzü.

"1963 küm Nagaland state angudang original quota 200 lemezütsü aser idangji Nagaland

nung district 3 aser nütsüing yongsük lakh 3.7 dang liasü. Ajisüaka tanübo Nagaland nung district 20 aser nütsüing yongsük lakh 22.58 shi kumogo" ta pai ashi.

Iba tebilemba asadangtsü aser ita ana tsüingda Rules nung nüngdakba temelenshi asütsü ta Union Minister Meghwal aser Additional Secretary (Legal Affairs), Ashutosh Mishra nati nangzü.

Nagaland nung High Court building mapatong talangka inyakba arur aser iba ama mapatong atema central funding mangubaji Nagaland dang asütsü akok ta Kikheto-isa ashi.

Senotsü peria meliaka state sorkari Rs. 242 crore agütsüogo

aser mapa tembangtsü atema ano Rs. 299 crore talila nüngdaker ta paisa ashi. Idangji Union Minister Meghwal-i iba onük Ministry of Finance dangi benogo aser tan financial year nung agizüktsü imlar ta langzü.

Nuiland, Tseminyu, aser Shamator District Courts tasentem yanglutsü atema centre nungi senotsü teyari nüngdaker. Item district nung state sorkari ali alizüktsü mulunga agizükogo ta Kikheto-i temepishiba ka agütsü.

Paisa Mon aser Noklak nung tang teyangludak District Courts aser tanga district-level projects atema senotsü tekaraba nung agütsütsü mepishi.

## MTLT-i IMDH atema AKM pusema nungiter

**Dimapur, May 26, 2025 (TYO):** Imkongliba Memorial District Hospital (IMDH) tia kanga mejungi aliba aser hospital blocks tasentem yangluba nung mapa shitak meinyakba atema Ao Kaketshir Mungdang (AKM)-i takhangba agütsüba nung Mokokchung Town LanurTelongjem (MTLT)-ia pusema nungitba metetdaksüogo.

AKM-i süoki ia bilemba aser

May 21, 2025 nü IMDH nung mapa inyakba tonga oa reprangdang aser osangtsüsang metetpelaba atema tenüingsang agütsür ta MTLT-i ashi.

AKM-i tebilemtsü khuretem lemsatepba aser bangdakpurtem, talisa contractor KC Infra Projects Pvt. Limited dang süoki ia bilema tekaratiba nung parnoki aibelena alibatam metongshitsü mepishir ta MTLT-isa ashi.

AKM-isa state sorkar dang

IMDH yangluba nung temulung agütsütsü akhangba MTLT-ia pusema nungitba metetdaksü.

IMDH ya Mokokchung nung shirangertem mezüing aodak lir aser shiranger aika atema iba mozüki nung dang taneptsü angutsü teimla lir. Anungji AKM-i IMDH dak sendakba nung kechi onüktemsa shiogo item onükji public tebilemtsütem lir aser bangdakpurtemi tekaratiba nung inyaktsüla, ta MTLT-isa ashi.

# 19 buba N.I. Jamir Academic Excellence Award liogo



**Dimapur, Monupii/May 26 (TYO):** Tawa sangdongba HSLC Examination 2025 nungi toppers nem tenüngsang agütsütsü asoshi Kohima Ongpangkong Telongjem ajanga 19 buba N.I. Jamir Academic Excellence Award sentong May 24, 2025 ü Molu KI Kohima nung agia liasü.

Sentong nung SDO (Civil) Peren, Sentilong Ozukum-i "Takotet Kaketshir" omen nung ajemdaker jembidang American Missionary temi Ao kin dangi shisaliok mezüng bener aruba indang tongmelang agi lemsatepa liasü aser tamangba yimsü tasen agizükba ajanga Laishiba azüngtsü aser angazüksü tejangraba aitdaksü aser iba yongji 1878 küm mezüngbuba school lapoka danga yimtsüngtemia prokshia ao ta ashi.

Tanü national literacy rating nung Nagaland ya jenjang tasem buba nung lir, saka terenlok aser shisaliok tejakleni renloka aoba

den lirumedema shisa akatsü tongtipang lir, ta pai ashi.

Kaketshir tajung kati lesson azüngba mapang Tsüngrem ya pei teyarir ama agizüker, technology tasen angazüka amshitsü jangrar, mapang melenshiba ama shisaliok melenshiba rajema pei agitsü tebilemba nung mesüi lokti ajungkettsü mangdang ayur, ta Sentilong Ozukum-i ashi.

Sentong akhumdong MP Lok Sabha, S. Supongmeren Jamir-i N.I. Jamir takum otsü tongmelang agi lemsatep aser kaketshirtem dang N.I. Jamir tongmelang takum, angazüksü aser azüngtsü tejangraba aliba, nüburtem yaritsü aser lokti ajungkettsü mangdang aliba ajanga ajungmesotsü ayongzüka liasü.

Pai kaketshir dang mapa ajak tepang o nung masü saka asangsang nung mapa kuma inyaksü ayongzük aser pei yariba nisungtem kodanga mamadoktsü aser shinga dena

tsükchitep malitsü ayongzüka liasü.

Sempet angurtem tenüng nung Moasanen Pongener aser Ujaren nati o tatsütsü jembidang parnoki lesson azüngba, tsürabur, tesayur aser temeimer temi yaritepba lemsatep aser topper ya tatem masü saka tetsüng ajemdaksü long ka ang lir ta ashi.

Minister, Rural Development, Metsubo Jamir aser Ongpangkong Mungdang tir, Alemtoshi Imsong natia o tatsütsü jembia aser Kohima Ongpangkong Telongjem tir Kilangchuba ajanga pela agizükba o jembia aser Member, N.I. Jamir Trust Board of Governors, L. Chubaonen Longkumer-i melepzüng o jembia liasü.

Iba anogo toppers parnok 23 nem nisung shia senpet sen 10,000 den kulizüng kakat tem Member of Parliament, Lok Sabha, S. Supongmeren Jamir ajanga amokja liasü.

## Dimapur DPDB senden amen, Moatoshi Longkumer-i Chairman mapa agizük

**Dimapur, Monupii/May 26 (TYO):** District Planning and Development Board (DPDB), Dimapur senden May 26, 2025 nü Deputy Commissioner, Dimapur indang Conference Hall nung amendang Advisor Moatoshi Longkumer-i DPDB Dimapur Chairman mapa agizükogo.

Sentong tenzüka jembidang MLA Moatoshi-i Board züngsem tasentem pela agizük aser ketdangsür ajunga dang Dimapur ya model district ka kuma melenshidaksütsü asoshi lungjemer inyaksü ajungshia liasü.

"Danga district temi Dimapur nüksütsüsa asenok teka amteper inyakti," ta pai ashi aser terenlok maparen tajungtiba nung inyaksü asoshi arok temulungtetba nüngdaker ta shia liasü.

Mezüng inyaksü kar tongmelang agi lemsatepdang, mapang shidak nung mapa akumtsü mechi Planning Board ajanga state sorkar nem emergency rescue vehicle tangsa nüngdakba amala proposals agütsütsü tongtipang lir, ta Advisor Moatoshi-i ashi.

Deputy Commissioner, Dr. Tinojongshi Chang, NCS ajanga proposals anendaka aliba indang

osang lemsatepa liasü. Ketdangsürtem melentepba ajanga East Dimapur nung administrative headquarters amenoktsü atema files agütsüba nung menu, ta pai metetdaksü.

Iba senden nung society registration atema application pending nung aliba ajunga agizük. Senden nung Er. Lhuvoyi, EE (Power), Department of Power, Dimapur ajanga Government of India indang Revamped Distribution Sector Scheme (RDSS) kübok power tsütsü tang temelenshi aliba indang osang tejangja agüja liasü.

Iba scheme nükjidong ya March 2026 tashinung Aggregate Technical and Commercial (AT&C) takoksa shilem 12-15 tsüngta ajemdaksütsü aser Average Cost of Supply (ACS) aser Average Revenue Realized (ARR) tsüngta tawa aliba nung apu alatsü asoshi lir, ta pai ashi.

Iba inyakyim nung shilem ka ama smart prepaid metering aser loss reduction measures amala state tesem ajunga nung amshi tenzükgogo. State Action Plan for Smart Consumer Interface (SASCI) kübok Kohima, Dimapur aser Chümoukedima atema 2021-22

aser 2022-23 asoshi smart meters 18,000 sanction süogo, ta Er. Lhuvoyi-i metetdaksü.

Department ajangasa February 2024 nung tenzükb "PM Surya Ghar: Muft Bijli Yojan" indang lemsatep, koba ajanga nisung aliba tesem nung kilem nung solar inoktsü ajungmesor. Nagaland nung residential rooftop solar (RTS) capacity targets ya 32.8MW lir aser Dimapur kisüng atema 8.337MW lemezükja lir.

Smart prepaid meters amshiba ajanga energy conservation, outages tajemba, tariff options telatet ka masü, consumers atema financial planning tajungba aser online recharge mela-mela sütetba ajanga service delivery tajungba aser rongsenketzüng nung aintsü, ta ashi.

Department of Power ajanga stakeholders ajunga dang state nung power infrastructure tajungba kumdaksütsü mechi item inyakyim nung nungita yaritsü ayongzüker, ta senden nung shia liasü.

Taruba senden nung PWD (R&B) aser Fisheries Department ajanga pei pei department inyakyim osang lemsateptsü nunglokja senden tembang.

# Mejangjaba nisung tasü mang ka nguteta lir

**Dimapur, Monupii/May 26 (TYO):** Mejangjaba nisung tebur (non-local) ka Blue Hill Station nung Northeast Travels counter anasa tasü mejanga lir ta nüburtemi nungi osang arua lir ta Control Room, Dimapur nungi May 25, 2025 nü telephone ajanga osang agütsü.

Iba osang nung ajemdaker East Police Station duty party pur iba tesemi arsanga ao aser iba nisungba tasü mang ya ngutet, shiba arishi küm 25-30 tsüngta asütsü, ta Dimapur Police ajanga sangdong ka nung ashi.

Parnoki tasü mang junga reprangdangba nung yiruba zübu kecha meliasü aser teka

achichilen 'D.P' ta teptsü tepa aliba angu.

Ozüng agi melaba maparen ajak renema inyakba sülen tasü mang ya PM examination aser identification atema District Hospital Morgue nung bener pa lir.

Nisungba ya tula sentsü temesüng, jeans sentsü tanak, cream sentsü shorts, belt sentsü tanak, sneakers sentsü tanak aser fanny sentsü tanak tasü mang anasa ngutet.

Kibur/kinunger/medemer temi Officer-in-charge, East Police Station, Dimapur den Mobile No. 7085055020 ajanga tongteprateptsü ayongzüker, ta sangdong ajanga ashi.

## Transport Commissioner-i Rah-Veer Scheme atema metetdaksür

**Dimapur, Monupii/May 26 (TYO):** Gari lendong ajurur alirtem Golden Hour mapang yaritepba aser Hospital/Trauma Care Centre bushia anir oa takum kumzüker nem taoba mapang Scheme for grant of Award to the Good Samaritan nüngja agütsür senpet agüja aliba tang Rah-Veer ta melener iba atema guidelines dak sendakba nung Transport Commissioner, Elias T. Lotha ajanga sangdong ka agüja liasü.

Iba scheme ya gari lendong ajurur aliba yaritsü asoshi nüburtem ajungmesotsü nükjidong nung tenzüker.

Gari densema lendong ataloker lia teyari agütsüba aser Golden Hour mapang medical treatment atema mozü kidangi anir aor ajungai iba sepet agizüktertsü.

Rah-Veer (Good Samaritan) shia nem Financial Assistance (Award) ya lendong shia sen 25,000 alitsü aser yangji talenba yamai lir - Rah-Veer (Good Samaritan) kati gari densema lendong tulu ka nungi nisung ka mesüra tali takum kumzükra sempet sen 25,000 agütsütsü.

Rah-Veer (Good Samaritan) ka dak temai gari lendong tesashi nungi nisung ka takum kumzükra, sempet sen 25,000 ya parnok tsüngta kasa

sadangtsütsü.

Rah-Veer (Good Samaritan) ka dak temai gari lendong ajurur alir ka dak tema takum kumzükra, lendong ajurur alir takum kumzükb shia senpet sen 25,0001 asütsü aser Good Samaritan shia timba agi sen 25,0001 agütsütsü.

Senpet shia "Certification of Appreciation" dena alitsü. Iba scheme ya 15th Financial Cycle, tetetzü March 31, 2026 tashi alitsü.

Ministry Guidelines tejangja, shimba yimya mesüra iba dak sendaka aliba osang tejangja department indang website <https://mvdnagaland.in/> nung agüja lir.

Motor Vehicles (Amendment) Act, 2019 indang Section 134A aser Rules for Good Samaritan kübok shia aliba ama Rah-Veer (Good Samaritan) shinga parnoki memeteti legal proceedings kecha malitsü.

Shia aliba ozüng kübok Good Samaritans / Rah-Veer nem agütsüba protections raksara, Rah-Veer/ Good Samaritan-i State / UTs ajanga Deputy Commissioner / Collector/ District Magistrate mendenpuba sür amenoka aliba Grievance Redressal Committee bushia arutsü akok.

## Mokokchung nung Viksit Krishi Sankalp Abhiyan Campaign atema senden amen

**Dimapur, Monupii/May 26 (TYO):** Mokokchung District nung May 29 nungi June 12, 2025 tahsi "Viksit Krishi Sankalp Abhiyan" campaign agitsü aliba dak sendakba jembishinütsü asoshi Additional Deputy Commissioner, Mokokchung, Chumlammo Humtsoe mendenpuba sür senden ka May 26, 2025 nü Deputy Commissioner, Mokokchung indang Conference Room nung mena liasü.

Dr. Keviletsu Khate, Senior Scientist & Head KVK Yisemyong, Mokokchung ajanga iba sentong indang

nükjidong tulutibaji aluyimer nem kharif corps atema modern agricultural practices indang awareness agütsütsü, sorkar indang scheme aser policy balala indang osang lemsateptsü, Soil Health Cards amshidaksütsü aser tarutsü nung research nung nüngdaksüba shisatsü aluyimer nungi agitsü lir, ta ashi.

Iba senden nung ADC Chumlammo Humtsoe-i district nung iba campaign takok ngua ayongzüksü asoshi department balala tsüngta osang agitepa aser amalitep akatsü ajungshia liasü.



Bahrain, May 26, 2025: Operation Sindoor outreach dak sendakba nung BJP MP, Jay Panda-i aniba teloki Bahrain semdangba mapang tangokba noksa nung angur.

## Guyana aser Qatar nung India ketdangsertemi kiralongra indang lemsatep

**New Delhi, May 26 (Agencies):** India nung party balala nungi shimtetba MP temi Guyana, Qatar aser Japan densema linük balala semdanga India-i kiralongra magizükteti kiralongra anema raraba lemsateper, ajioda item linüktem jagi kiralongra anema raraba nung India pusemba lemsatepogo.

Congress MP Shashi Tharoor-i aniba teloki Guyana semdangba sülen Mongolbarnü Panama tonga aotsü aser NCP-SP lenir Supriya Sule-i aniba telokia Qatar nung lenirtem ajurua kiralongra indang lemsatepogo.

Operation Sindoor outreach kübok party balala nungi shimtetba telok teneti linük 33 semdanga Pakistan-i kiralongra pusemba aser India-i kiralongra anema raraba osang lemsateper.

Amongnü anepdang Congress MP Shashi Tharoor-i aniba teloki Guyana nung tongti ketdangsertem ajurua senden mena liasü.

Amongnü anepdang Guyana Ato kilonser Phillips-i Berbice

nung India nung MP tem agizüka liasü. Parnokisa Guyana tatong Tir Dr Bharrat Jagdeo ajurua kiralongrartemi Pahalgam amakba, India-i Operation Sindoor agiba aser Indus Water Treaty tezüngzüktep agienba lemsatepa liasü.

Kasa senden nungji India aser Guyana tsüngda amalitepa inyakba indang jembia. Guyana Ato kilonseria India-i kiralongra anema raraba pusemba jembia liasü.

Tharoor-i aniba telok nungji Sarfaraz Ahmad (JMM), Gants Harish Madhur Balayogi (TDP), Shashank Mani Tripathi (BJP), Bhubaneswar Kalita (BJP), Milind Deora (Shiv Sena), Tejasvi Surya (BJP) aser taoba mapang Indian Ambassador to US Taranjit Sandhu nung dena lir.

Hombarnü NCP-SP MP, Supriya Sule-i aniba telokia Qatar nung junior minister ka ajurua Pakistan nungi kiralongrartemi Pahalgam amakba, India sepaitemi Operation Sindoor kübok

Pakistan nung kiralongrartem camp aika amakba aser linük nüburtemi kiralongra magizüktetba lemsatepa liasü.

Parnoki Dr. Mohamed bin Abdulaziz bin Saleh Al Khulaifi, MoS for Foreign Affairs ajurua liasü, ta Qatar nung aliba Indian Embassy-i metetdaksü.

"MoS Dr Al Khulaifi-ia India-i kiralongra anema raraba aser region nung yimjung aser azükaru atema inyakbaji Qatar-i pusemer ta shiogo," ta Embassy-isa metetdaksü.

Amongnü parnoki Qatar Shura Council nung Deputy Speaker Dr Hamda Al Sulaiti den MP tem aika ajurua senden mena liasü.

Sule-i aniba telok nung züngsemtemji BJP lenirtem-Rajiv Pratap Rudy, Anurag Thakur aser V Muraleedharan nung den Congress lenirtem Manish Tewari aser Anand Sharma na, TDP lenir Lavu Sri Krishna Devarayalu, AAP lenir Vikramjeet Singh Sawhney aser taoba mapang India ketdangser Syed Akbaruddin nung den densema lir.

## Pakistan atema itdangittsüba atema NIA-i CRPF sepai ka apu

**New Delhi, May 26 (Agencies):** Pakistan atema itdangittsüba atema National Investigation Agency (NIA)-i Central Reserve Police Force (CRPF) sepai ka puogo, ta Hombarnü ketdangsertemi metetdaksü.

Tai tonglokja alisangji CRPF nung Assistant Sub Inspector, Moti Ram Jat lir. Pai 2023 küm nungi tenzüka linük security dak sendakba tongtibang osangtem Pakistan Intelligence Officers (PIOs) den lemsatepa arur, ta

kasa osang ajanga metetdaksü. Item osang lemsatepba atema Jat-i PIOs ket nungi senotsü ngua liasü.

Delhi nung NIA-i Jat apuba sülen Patiala House nung aliba Special Court kati anir ao. Iba sülen court-i June 6 nü tashi pa NIA ket nung agütsüogo.

CRPF-ia sangdong ka ajanga, Central agencies den senteper CRPF-i CRPF sepaitemi social media amshiba mita reprangba mapang nung Jat dak melung melempi pa

anema bushisüngdanga liasü, ta metetdaksü. Jat-i telatetbatem anema inyakogo, ta CRPF-isa metetdaksü.

"Maneni bushisüngdangtsü atema pa National Investigation Agency (NIA) ket nung agütsüogo," ta kasa sangdong ajanga metetdaksü.

"Iba sülen 21.05.2025 anogo nungi linük temzüng kübok tapet ozüngtem aser CRPF Rules nung ajemdaker pa mapa nungi anentsüogo," ta CRPF-i metetdaksü.



May 26, 2025 nü Georgetown, Guyana nung aliba India nungertemi Congress lenir Shashi Tharoor, TDP lenir Ganti Harish Madhur Balayogi, BJP lenirtem- Shashank Mani Tripathi, Bhubaneswar Kalita aser Tejasvi Surya, Shiv Sena lenir Milind Deora aser taoba mapang ketdangser Taranjit Sandhu nung agizükdang tangokba noksa nung angur.

## India nung ano nisung 1,000 dak coronavirus putetogo

**New Delhi, Monupii/May 26 (Agencies):** Hombarnü ano nisung 1,000 dak COVID-19 putetogo aser teimtibaji Kerala, Maharashtra aser Delhi nung putet, ta Ministry of Health & Family Welfare-i metetdaksü.

Tang tashi nungbo Andaman & Nicobar, Arunachal Pradesh, Assam, Himachal Pradesh aser Jammu & Kashmir ama state tem nungbo coronavirus puteta mali.

Hombarnü Kerala nung ano nisung 335 dak coronavirus putetba sülen ajak agibo shiranger 430 kümogo aser Maharashtra nunga ano nisung 153 dak coronavirus putet.

Linük yimtiba, Delhi nung ano nisung 104 dak coronavirus putetba sülen ajak agibo shiranger 99 jungogo, ta Ministry of Health & Family Welfare-isa metetdaksü.

Delhi health ketdangser kati, tang tashi nungbo tensa azüokteta dang lir aser ketdangsertemi junga mita

reprangdar, ta metetdaksü.

Hombarnü Bihar nunga tang mezüng state yimtiba, Patna nung arrshi küm 31 tebur ka dak coronavirus putet. Tang paji nija hospital ka nung anepaludar.

"Patna nunga nisung ka dak coronavirus putetogo. Tawa pa state adener ainlen mejaja. Pa dak putetba waraji kangabo mesashi," ta Patna Civil Surgeon Abinash Kumar Singh-i ashi.

West Bengal nung ano nisung pezü dak coronavirus putetogo aser ajak senteperbo state nung nisung 11 dak iba tashidak putetogo.

Tangu sashiba dak sendakba timtem alirtemji tang sorkar hospitals aser nija hospitals nung yaridar. Parnok teimbaka Kolkata aser temeket aliba tesemtem nungi lir.

Union Health Ministry nung tongti ketdangsertemi, tawa India nung putetba coronavirus wara ya tesashibo masü, anungji shisabulutsü menügdak, ta metetdaksüogo.



Bengaluru, May 26, 2025: Bengaluru nung University of Liverpool campus amenoktsü atema Letter of Intent (LoI) agütsüba sentong nung Union Education Minister Dharmendra Pradhan-i British High Commissioner to India Lindy Cameron den salemdang tangokba noksa nung angur. Kasa noksa nung Prof. Tim Jones, Vice-Chancellor, University of Liverpool aser Vineet Joshi, Interim Chair, UGC nata angur.

## Foreign Universities 15-i campus amenoktsü

**New Delhi, May 26 (Agencies):** Hombarnü Union Education Minister, Dharmendra Pradhan-i, taküm India nung bendanger universities 15-i campus amenoktsü, ta metetdaksü.

Dharmendra Pradhan-isa, UK nungi University of Liverpool-i Karnataka yimtiba, Bengaluru nung campus amenoktsü aser mezügbuba batch nungi kaketshirtemji sangküm August ita nungi agizüktü, ta metetdaksüogo.

Bengaluru nung University of Liverpool campus amenoktsü atema University Grants Commission (UGC)-i temelaba agütsüogo.

Sentong ka nung jembidang Union Minister, Pradhan-i, "India nung campus amenoktsü atema University of Liverpool nem Letter of Intent (LoI) agütsüogo; iba university ya UK nung shisaliok reju tajungtibatem rongnung ka lir. Tanü LoI agütsüba ya India-i shisaliok atema alima nung universities tajung den shisaliok tsütsü partnership yangluba nung alizüng ka tongtetba lir," ta metetdaksü.

"India nung foreign

university campus amenoktsü atema yimjak nung sangdongba university pezübubaji University of Liverpool lir. Taküm academic year nung India nung foreign universities 15 amenoktsü. Bengaluru nung Liverpool campus amenokba ajanga research & innovation nung temaba jenjang alangzüktü ta ni amanger," ta paisa metetdaksü.

Bengaluru nung amenokba campus nungji mezügbu business management, accounting & finance, computer science aser biomedical sciences programmes agütsütsü. Iba campus nungsa game design indang programme ka tenzüktü.

Hombarnü Bengaluru nung University of Liverpool campus amenoktsü atema Letter of Intent (LoI) agütsüba sentong agiogo. Iba dentong nungji Union Education Minister Dharmendra Pradhan den British High Commissioner to India Lindy Cameron, Professor Tim Jones, Vice-Chancellor, University of Liverpool aser Vineet Joshi, Interim Chair, UGC nung den densema liasü.



## TIR YIMYIM YIMOBILEM (EDITORIAL)

DIMAPUR TUESDAY, MAY (MONUPII) 27, 2025

### Asenokia asen agitsübo jembitettsüla

**Y**akanü New Delhi nung linük ajunga asoshi terenlok sentong yanglur rogo NITI Aayog den state-tem nungi Chief minister-tem dena senden alidang, Nagaland chief minister Neiphiu Rio-ia Nagaland nung rongdak nungdaka inyaktsüba terenlok mapatem tongtibang kar indang kanga junga shiogo, anungji pai ashiba nungji tamang kaa NITI Aayog purtemi mapa kuma inyaktsü nungbo Nagaland-a asen tenük agia ngua kanga junga renloka aotsü. Aji oda, Nagaland Chief minister-i NITI Aayog senden nung Nagaland asoshi inyaktsü nungdakba mapatem benokba rongnung Kohima nung tayimtsü anendak Ciethu Airport yanglutsü asoshi sen crore meyrirjang ti dak tali nungdakba indang metetdaksüogo. Atangji, linük ajaklen state shia yimtiba nung tayimtsü anendak kabosa alitsüsa yanglutsübaji center government sentong nung lir, kechiyong tanü asungbo nungdak ajak mapang, nübo aser rongsen kümzüksü mechi tayimtsü nung dang senzür aser yimten yimsüsürtem alidak yimti nung tayimtsü anendak alitsübaji kangasa nungdaker. Iba Ciethu tayimtsü anendak atema sorkari ali acre meyrirjang ka dak tali alia lir aser tayimtsü tulua anentetsüsa yanglutettsü ta chief ministeri metetdaksüogo. Tanabuba rongdak nungdakji, Institute of Science Education and Research (IISER) lapoktsü atema Chümoukedima district kübok Sukhovi nung alli acre 200 shi wazüka yua lir. Ano, Nagaland atema rongdak nungdak inyaktsüba kaji, yaküm nungi tenzükba Kohima district kübok Nagaland Medical College, koba dang Nagaland Institute of Medical Sciences & Research (NIMSR) ta ajar, iba ya Center government-i reprangtsüsa AIIMS mesüra RIMS jenjang nung züngokdaksünüa taginüba ka shisema liasü. Atangji, Naga nunger ajak asoshi, talisa medical azüngertem asoshi, AIIMS mesüra RIMS ama kati agiadok nungbo, ano medical college jenjangji tajungba kümadoktsü aser Nagaland state asoshia senotsü khuret pongbatsü. Ano, Nagaland asoshi tangsa renemtsü nungdakba mapa kaji Kohima nung Nagaland high court ki merenemteti aliba mapa renemtsü asoshi senotsü crore 300 shi nungdakba indang kasa NITI Aayog senden nung Chief minister-i shisema liasü. Iba denji, ano Chümoukedima district nungsa Chathe lenden nung yimti tasen ka tenüng agi Nagaki yanglutsü asoshi center nungi senotsü nungdakba shisemogo. Itemji kodang reprangdangdir, Nagaland asoshi nungdakba sentong tulu aser tajung ajakji district ana nung dang lir, kaji Kohima aser tangabaji Chümoukedima. Aji oda, gari aser train lenmang yanglutsü nungdakba terenlok mapatem daka alaka tanga district-temjibo yutsür Dimapur aser Niuland na nunga tang tangbo Nagaland asoshi terenlok mapa inyaktsü asoshi sentong mali südi ta angateter. Aji oda, yangi temalen shisema aliba terenlok mapa sentongtem jagi Wokha district-a matonger, anungji anüdok aser anüdoklentiplen aliba district-tem terenlok mapatem agi atongtsübo ano Nagaland government pongmang nunga mali südi. Atangji, Foothill Road agi National Highway kuma yanglutsü asoshia shisemogo. Iba lenmang yagi Mon nungi Peren tashi nung Longleng, Mokokchung, Wokha aser Niuland district amshir. Ajisüaka, iba Foothill lenmang yaa nübortemi Foot Hill Road Co-Ordination Committee tenteta government merongshi tashibo pongmang nunga mali asü, ajisüaka rongshia-rongshia state government-a ajemajema melitet, Mon nungi Dimapur tashi dang jembia aliba Peren tashi tua atsülang tashi nung dang tali temulung tagütsüba agüja inyakba angur. Ano, kasa Foothill Road agi ajanga süiba tesemtem ajanga süitsüsa Dimapur nungi Tizit tashi Train jajatsü nungdakba indanga chief ministeri kanga süokia jembio. Iba train lenmang nungiang Tuli Railway station atongtsü aser tesülenbo Mokokchung tashia train melamelaa atutettsü. Item ajak jagi Naga nunger ajak ajangzüksü, ajisüaka Chief minister-i jembibaji dang masü, asenokia asenok asoshibo ogi Delhi nung jembitettsüla, kechiyong tang amaji khen khen NITI Aayog senden nung oagi Chief minister kisüngi ashiba agi meperitsü. Aji oda, asenoki asen asoshi mejembitetra, terenlok aser tagitsü mapaji tangar asoshi dang asütsü. Atangji, Kohima aser Chümoukdima-jia asen limasa saka Mokokchung district tenüng nung yimsü asürtemia pei constituency ta masü pei district asoshibo jembitettsüla.

## OLEMSABANG



Ao Theological Associationi Rev. Kijungluba Lifetime Ministerial Award 2025 küm Rev. Dr. L. Kari Longchar anem agütsür. Pa taküm Otsü tatsüka den pai tenzükba wadang indang tongmelang agi kar agütsür:-

Tenüng : Rev. Dr. L. Kariemba Longchar.  
Tebu Tenüng : Mr. Longriyongdang Longchar.  
Yim : Chungtia.  
Tasoba : Mongputeni (October) 21, 1942.  
Baptiba : 1959, Chungtia Baptist Arogo.  
Tsüngrem Tenzüksü Nangzükba : Rongchii (April), 22, 1965.  
Kibong Akümba Anogo : Rongchii (April) 4, 1973 nung Ms. S. Atula Jamitsür, (Mangmetong) Pastor Tekatempa jala.  
Ordination : Yimpoksüi (Nov.) 12, 1995, Impur Baptist Arogo.

### Tazüngba (Educational Qualification)

Chungtia LP School nungi tenzük : 1950.  
Class IV, Ongpangkong Middle English School : 1955.  
Class IV – VII, Mangyangnokcha Mkg : 1959-1962.  
Class VIII- X, Clark Memorial Institute School, Impur : 1963-1966.  
Pre-University, St. Anthony College, Shillong : 1966-1967.  
Bachelor of Arts Degree Course, Fazl Ali College : 1967-1970.  
Bachelor of Divinity, Union Biblical Seminary, Yeotmal : 1971-1975.  
Master of Theology, SAIACS, Bangalore : 1985-1986.

### Tenzüka Aruba (Ministerial Experience)

Teacher, Town Middle English School, Mokokchung : 1967-1968 (Substitute).  
Teacher, Baptist English School, Mokokchung : 1970-1971.  
Home Evangelist, MTBA : 1975-1979.  
Pastor, Ao Baptist Arogo, Shillong : 1979-1984.  
Pastor, Sabangya Baptist Arogo : 1986.  
Youth Educator, Ongpangkong : 1986-1991.  
Executive Secretary, ABAM : Rongchi (April) 1, 1996- Metsüremi (March) 31, 2001.  
Director, Peace Affairs, NBCC Kohima : 2001-2011.  
Missionary-at-large, Chungtia Baptist Arogo : 2012- till date.

### Taa Magii Inyakba (Honorary Ministry)

Sunday School Recorder, Impur : 1963.  
Secretary, Ongpangkong Kaketshir Mungdang, Impur Unit : 1965.  
Secretary Executive Committee, Christian Endeavour (C.E) Impur Baptist Arogo : 1965.  
Secretary Social Service, Fazl Ali College Students Union : 1967-1968.  
President, Chungtia Students' Union : 1969-1970.  
Manager, Ao Milen : 1969-1970.  
Secretary, Ongpangkong Kaketshir Mungdang : 1970-1971.  
Editor, Lanur Teimla : 1978.  
Founding Member, Tuvlong Society Chungtia, since : 1978.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir

African evangelical lenirtemi tongti shilem agitsüla: Rick Warren



**May 26, 2025:** Association of Evangelicals in Africa (AEA) General Assembly nung jembidang 'Purpose Driven Life' kaket zülusang aser Purpose Driven Church nung pastor, Rick Warren-i, Kibubai tenyaba wadang renemtsü atema alima mission nung Africa nung Evangelical lenirtemi tongtibang shilem agitsüla, ta ayongzüük.

California nungi online ajanga iba sentong nung jembidang Rick Warren-i Africa nung Evangelical lenirtem dang, mission wadang nung lenir asütsü atema Africa nung aliba Arogotemi inyaktsüla, ta ayongzüük.

Warren-i, "United States dang nungibo Africa nung aliba Khristan nütsüng teimba lir. Tang alima nung Khristan nütsüng teimba aliba continent ji Africa lir. Iba continent nung Khristan million 430 lir. Asenok rongnung lenirji Church in Africa asütsüla," ta ashi.

California nung Saddleback Church tenzüksang Warren-i linük aika dangi missionary tem yokogo.

Pa indang 'Finishing The Task' nükjidong lemsatepa pai 2033 küm Arogo küm 2000 ajungba küm nungbo Kibubai tenyaba wadang renemtsü nükjidong yur inyakba lemsatep.

Küm 20 tejaklen South Africa nung tenzüka aruba ajanga Warren-i mission aser ministry indang tejangja angateta liasü.

Warren-i, "Pastor tem dang sayutsü atema ni Johannesburg-i arua liasü. Anogo asem tashi ni lenirtem nem training agütsü aser ibaji continent tesem balala nung livestream süa liasü. Iba training ji tembangba mapang nung kü dang South Africa nung aliba Arogotem tia reprangdangtsü asüngdanga liasü," ta metetdaksü.

Pa kanga tezülen aliba yimtsüng kati anir ao. Iba yimdakji electric light aser tzü supply maliasü aser süki tila ka nung tamangertem adenshia tekülem agi.

"T a n u r t e m chiyungdaksütsü atema tesem ka liasü, school kaket kar liasü saka yipten maliasü. Aonung tanurtemji süki nungji mejangdaksü. America nung senotsü peria aliba ozü Arogo tului inyakba dang nungibo Africa nung aliba iba Arogo tilaka yagi mapa tuluba inyakdar, ta ni reprangtet," ta pai ashi.

"Arogo tila tiaji ngur kü melungjang raksa. Küm aika ni lenirtem nem training agüja aru saka ni item ama timtemba nüburtem kangabo anepalu masü, ta ni rateta liasü," ta pai ashi.

Yangji arrshi küm 25 pastor kati Warren dang, "Ni na shibaar meteta lir. Na Pastor Rick lir. Hopta shia ni post office-i oa nai sayutsüngiba download asür. Ni agiba training ajakji na nungi dang lir," ta ashi.

Warren-i, "Ni ibaji mamangteti liasü. Iba lanur pastor yagi sayutsüngiba download asütsü atema hopta shia ghonda anana jaja liasü, iba sülen par Arogoi meyipa oa züngsemtem dang sayutsüngi. Ibaji meteta ni tangatetba kanga melenshia liasü. Ni kü taküm piyong item ama nisungtem tenzüksü, ta ni melungteta liasü," ta ashi.

Iba aonungji Warren-i moapu nung mener Laishiba zünga Tsüngrem dang alima tesem ajak ayimjemtsü atema pa nem shisatsü agüjang, ta sarasadema liasü.

Iba sülen pai "P.E.A.C.E. Plan" apiteta Khrista osangtajung sangdongtsü, lenirtem nem training agütsütsü, sensakertem yaritsü, shirangertem anepalutsü aser lanurtem sayutsü atema asalentong yanglua liasü. Pai apitetba PEACE model ji tangbo alima tesem ajaklen Arogotemi benshir.

"Ni Africa nung aliba mapang Tsüngremi kü nem P.E.A.C.E. plan apitetdaksü. Anungji lenmang aisü nung ni Africa nung ka ama aküm. Ni senso ana aküm aser Rwanda nung aliba President's Advisory Council nunga inyaka liasü," ta pai metetdaksü.

Tanübo Europe nung aliba Arogo tulu aika nung lenirtemji Africa nung lir.

Warren-isa, tesüiba küm 100 tsüngda alima nung Khristan yimsü tiyongtsü North tsütsü aliba tangbo tiyongtsüji South tsütsü kümogo, ta ashi.

"Küm 100 tejaklen alima nung Khristan nütsüng shilem 95 bo Europe aser North America nung liasü, ajisüaka tanübo alima nung Khristan nütsüng shilem 95 bo Africa, Latin America aser southern Asia nung lir," ta pai metetdaksü.

"Tang alima nung nütsüng shilem 50 bo arrshi küm 30 ser tekübokpurtem lir. Asenoki

Khrista osangtajung agi alima ayimajemdi süra asernoki global South aser alima nung aliba yimtem nung lanurtem ayimjemtsüla," ta pai metetdaksü.

Warren-isa, "Tang United Kingdom, Paris aser Moscow nung aliba Arogo tulutem nung lenirtemji Africa nung pastor tem lir. Nenok ya tarutsü nung lenirtem dang masü saka tang-a lenirtem lir," ta metetdaksü.

Alima nung Kibubai tenyaba wadang merenemtetbaji anüolen aliba lenirtemi south tsütsülen aliba Arogotem mezüngsemba agi liasü, ta pai ashi.

Kibubai tenyaba wadang renemtsü atema ajak züngoktsüla, longjemtsüla aser local Arogotem nung rangloker inyaktsüla, ta pai ashi.

Onük tembanga Warren-i Africa nung evangelical lenirtem dang alima mission wadang nung yakbang asütsü ayongzüük.

"Lenitsü atema Tsüngremi Church of Africa ajar, ta ni bilemer. Iba wadang ya rongdak inyaktsüla, aser iba atemaji Africa renema lir," ta pai ashi.

ANOGO ABEN TSÜNGREM DEN

Sarasademang, ataang mesüra mapa ~ T.Ken 94:11-23

"Tamajung inyakeretm anema ni asoshi shibai noktaksü? Temenen inyaker anema ni asoshi shibai noktaksü?" (t.16). Iba tasüngdangba nung kechi koma telangzüba ka agütsütsü ni memetet.

Tebilemstütem asoshi asenoki sarasadem dang asütsü mapang ka lir. Asenoki ataa alitsüba mapang ka lir. Tsüngremi "tangbo masü- ni tesülen ibai reprangtsü" ta ashitsüba mapang ka lir. Saka asenoki inyaktsüba mapang ka lir. Mosa noktaka atar nüburtem Ejip nungi adokdaksüba, mesüra Dawidi Tsüngrem O bendangba mapa inyakdang ama.

Asenok alima tesangwa ama noktaker sangwadaksütsüba mapang ka lir, asenok alima metsü ama alima raksaa aodang aji kümzüksü amshitsü mapang ka lir.


Terepranger ka ama, "Junger, ni iba atema sarasademtsü" ta ashitsü koda temüla! Junger, yamaji inyakang. Saka Tsüngremi ashir, "Ni atema tamajung inyaker anema shiba noktaksü?" Telangzüba: Shirnoki Tsüngrem parnok Teyarir ta meteta lir parnoki noktaksü. "Kibubai ni meyarilasang Kü nela sür lila" (t.17). "Saka Kibuba kü mitsa aser kü Tsüngrem, kü lung, shiba dak ni jenoker" (t.22). Kodang Tsüngrem ne teyarir lidir, kodang Tsüngrem O nung aruba Tsüngrem tashi na katir, nai iba lima temenen anema noktaktettsü.

Shirnok temenen nungi pilaa lir mapa inyaktsü ajar. "Temenen chuba menden, kobai temenen ozüng kümdaktsür, ibaji ne den telungjem lidima?" (t.20). Tanü asenok temenen aika nungi kümzüksü ozüng kar.

Aji saka shirnok temenen nungi pilaa lir, parnoki tamajungba anema Tsüngrem den noktaksüla- Pai tatem nung takok agütsütsü ta amangertem. Asenoki rara karbo makoktsüsa akok, saka Tsüngrem tenüng sangang asenoki raraji akoktsü!

Tamajung inyakertem den Khristantemi pelaa malitsüla. Asenoki parnok den sarasadema, ataa aser mapa agi inyaktsüla. Tsüngremi na Pa asoshi tawabangba ka südaktsüner. Pai na kong yutsür idakji taküm aliba kuli ka süa liang. Kodang nai sarasademer, ataa alir mesüra shilem agir, Pa leniba asüngdangang.

'Duck Dynasty' tentetsang Phil Robertson süogo



Phil Robertson

**May 26, 2025:** Duck Dynasty tentetsang, Phil Robertson alima nungi pilaogo; pa arrshi küm 79 liasü, ta par kibongi metetdaksü.

Par jabaso aser jabaso kinüngtsü- Willie Robertson aser Korie Robertson nati Facebook ajanga, "Kübu, kinüngbu ka aser oboula ka, Phil Robertson tang Kibuba den lir. Pai aiben onok dang tenyar Paul-i jembiba o- 'teimla malirtem ama nenoki mangyim

ibaji cancer amai lir ta doctor temi shiogo, ta metetdakja liasü.

Duck Dynasty tenzükang, Robertson-i Yisu Khrista taochi ajanga pa taküm alangzükb taküm kuli lemsatep aser par kibongi aika Khrista dangi aniogo.

Korie Robertson-i, "Pa taküm ajanga kongshiba nüburtem aikati temeim lemsatepba den külemi sarasademtsüba atema pelar. Khrista osangtajung lemsateptsü atema pa dak tejangraba tulu liasü," ta metetdaksü.

"Onok kinüngertem tang nija sentongtem agir ajisüaka pa taküm bilemteta memorial sentong agitsü aser iba osangji nenok nem-a metetdaksütsü," ta laisa lemsatep.

Phil Robertson-i pa kinüngtsü toktsür pilaogo. La-a tesüiba ita ishika temang mejungi dang alir.

Phil Robertson taküm otsü indang documentary aika den film "The Blind"-a lir.

Tesüiba küm aika Robertson ajanga nisung jenti Khrista agizüka baptitsü ajungmesoa liasü.

**AO OSHI ANGAZÜKDAK:****TANÜ ANGAZÜKTSÜBA OJANG****Tenem**

(adj) züngdangba lirtuko sülen (fifty)

\* Küm tenem shia arogo aser lokti tentet jubilee amonger.

**Tenemnem**

(adj) tila aser tobur tajung (small and cute)

\* Arem nung tenemnem ozü tapu ka telok külemi dang senzür.



Tir Yimyim

**OLONG PAITEP # 7163**

|    |  |    |  |    |  |    |  |    |  |   |
|----|--|----|--|----|--|----|--|----|--|---|
| 1  |  |    |  |    |  | 2  |  |    |  | 3 |
|    |  |    |  |    |  |    |  | 4  |  |   |
| 5  |  | 6  |  |    |  | 7  |  |    |  |   |
|    |  |    |  |    |  |    |  |    |  |   |
| 8  |  |    |  |    |  |    |  |    |  | 9 |
|    |  |    |  |    |  |    |  | 10 |  |   |
|    |  |    |  | 11 |  | 12 |  |    |  |   |
|    |  | 13 |  |    |  |    |  |    |  |   |
| 14 |  |    |  |    |  | 15 |  |    |  |   |
|    |  |    |  |    |  |    |  |    |  |   |
|    |  |    |  | 16 |  |    |  |    |  |   |

**TIPIEN**

1. Ojembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzüik asendak - 5
14. Tsünpang tema aliba - 5
15. Ken atenba yimya - 5
16. Asangur - 8

**LANGTSÜNGLEN**

1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjidong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

**OLONG PAITEP # 7162 TELANGZÜBA****TIPIEN :**

1. Taa, 3. Teküm, 6. Aibelen, 7. Aut,
9. Ajizük, 10. Ojala, 11. Semer,
13. Sen, 15. Kioktsü, 17. Itsük,
18. Kar.

**LANGTSÜNGLEN :**

1. Tai, 2. Asensor, 3. Tanü,
4. Kua, 5. Mitsüksü,
6. Azübenshi, 8. Lah,
9. Jangkok, 12. Akok,
14. Nashi, 16. Sür.

**NAI-A YA METETTER MA**

Realme-i May 27, 2025 nü sayaba GT 7 smartphone ajanga Guinness World Record ka yangluogo aser iba ya "Longest Marathon Watching Films/Movies on a Mobile Phone" atema lir.

Iba otsü ya GT 7 nung 7000mAh battery den 120W charging capability aliba ajanga yanglutetogo ta Realme-i ashi.

May 23, 2025 nü Guinness World Records ketdangsür kati iba kuli agütsüogo. Iba battery system ya TÜV Rheinland nungi 5-Star Battery Certification nguogo ta Realme company-isa ashi.

Realme-i "Endless Power Journey" ta ser Rome, Italy nungi tenzükba European cruise sentong ka nung iba otsü yanglutsü meranga liasü.

**Assam forest dept-i mamangtetsüsa süngdongtem atem****Guwahati, May 26, 2025**

(Agencies): Assam nung Dibrugarh Forest Division ajanga mamangtsü osang sangdongba ajanga ashishitep ken o tulu ka adoka lir.

Assam nung Amrit Brikshya Andolan ta ser mega tree plantation ka atema iba ken o adok.

Forest ketangsürtemi ali hectares 28 nung saplings 3,31,929 atem ta Right to Information (RTI) Act telangzüba ka nung shia lir. Ajisüaka ali tasazük nungi ketdangsürtemi ashiba saplings atemtsüji tamakoktsü.

Dibrugarh nung Divisional Forest Officer (DFO) ajanga telangzüba anguba sülen Dhekiajuli nungi RTI activist Dilip Nath-i ashishitep ken o benok.

Forest department guidelines nung hectare (with 2-meter spacing between saplings) ka nung saplings 2,500 dang atemtsü lateta lir.

Iba tetezü ali hectares 28 nungji saplings teimba agia 70,000 dang atemtsü akok aser ibaji ketdangsürtemi lakh 3.3

asüba dang nungi kanga agi tajemba lir.

Forest ketdangsürtemi ashiba süngdong atemtsü atema hectares 133 bosa nüngdaker aser forest areas masüdak atemtsü süra hectares 829 (5 meters spacing) nüngdaksü.

"Dibrugarh DFO-i item saplings kong atem? Parnoki süngdongtem atem süra kanga tajung saka kong atem. Asü iba ya tree plantation tenüng amer public sen miimzüka agitsü merangba inyakyim ka lir?" ta Nath-i asüngdang.

Principal Chief Conservator of Forests (PCCF)-i July 21, 2023 nü official order agütsüba nung Andolan kübok süngdong atemtsü atema forest divisions balala nem Rs 1.65 crore lemsütsüba shia liasü.

Senji Sept 8, 2023 nü Rs 27.75 lakh, Dec 11, 2023 nü Rs 50 lakh, Dec 12, 2023 nü Rs 15 lakh, Aug 28, 2023 nü Rs 25 lakh, Sept 22, 2023 nü Rs 10.75 lakh, June 16, 2024 nü Rs 60 lakh aser July 31, 2024 nü Rs 22.80 lakh agütsü.

Iba Andolan kübok

Dibrugarh Forest Division nem Rs 1,58,40,305 lemsütsü.

Dibrugarh division-i Abhaypur aser Joypore villages nung saplings atemba den nurseries ana lapok. Nursery ana rongnung ka Moran nung lir aser iba ya ali tasazük hectares 5 lir aser iba nungi saplings lakh 8 adok ta forest ketdangsürtemi ashir.

2024 nung school, tea estate aser nija telok balala nem saplings lakh 10 agütsüogo ta Dibrugarh Forest Division-i ashir. Ajisüaka parnoki ashiba distribution aser plantation osangtemji alia ser süngdong atemtsü lateta aliba den khenyongi meputep.

Iba onük atema activist Nath-i Chief Minister Himanta Biswa Sarma dang bushisüngdang asütsü ayongzükogo.

"Amrit Brikshya Andolan ya senotsü ajangzüktsü atema dang inyaker asü. Iba süngdong atemba indang dang masü saka public temulung alemba aser state senpong nungi senotsü amshiba indang lir" ta paisa metetdaksü.

**Yimsüsür aser ketdangsür tesentaktep bushisüngdangtsüla: Mukul****Shillong, May 26, 2025**

(Agencies): Meghalaya nungi yimsüsürtem aser ketdangsürtem tsüngda ozüng alema maparen inyakba, talisa nakmati atuba nung tesentaktep lir ta Leader of Opposition, Mukul Sangma-i ashi.

North Garo Hills Deputy Commissioner (DC)-i arrtsü adena kozü shibelenba inyakyim bushisüngdang asütsü tuyuba sülen ghonda 24 tsüngda transfer asü ta Mukul-i ashi.

"North Garo Hills nung DC tasenbai taoba DC-i tuyuba ama bushisüngdang südaksütsü asü

koda. DC ka ageintsüba official order atema inyakyim shitak lateta lir aser mashii dangbo transfer masür" ta paisa ashi.

"Shibai DC ka transfer asür? Minister mesüra Deputy chief minister-i masür. Chief Secretary ajanga transfer asütsüba file Chief Minister-i mulunga magizük tashi DC ka transfer asütsü makok" ta Mukul-i Supreme Court ajanga ashiba onük nenshia ashi.

Meghalaya nung ozüng alema nakmati atur saka DC aser Superintendent of Police (SP) temi Mines and Minerals

(Development and Regulation) Act (MMDR) kübok iba inyakyim mazüokteter ta Mukul Sangma-isa ashi.

Nübortemi FIRs benokogo saka FIR aika kecha mesü dang süidaksür aser okadak kuli tejangja maliba indang osang sangoktsür ta paisa ashi.

Laitumkhrach police station nung investigating officer ka transfer asü aser iba sülen iba ken o jembiba SP anien. Iba ya sorkari tashiyim amshiba lir anungji okadaki iba ya metettsüla ta Mukul-isa ashi.

**Manipur nung taila hon shibelener nisung 3 apu****Imphal, May 26, 2025**

(Agencies): Manipur Police-i Kakching district nung taila hon shibelener nisung asem puogo.

Osang tejangja ka angazükba sülen police-i mita aodang Hangoon area nung temulung meleme bilemertem apu.

Police-isa parnok ket nungi taila hontem ngutetogo.

Parnoki 'impure gold' bener

aru aser iba nungji trademarks enoker 'pure gold' ta shir yokdok. Parnoki touzük balala indang gold bars yanglutsü atema specialized equipment amshi ta Manipur Police-i ashi.

Ozüng alema hon shibelenerntem ya Shivaji Gaikwad (39), Sangli, Maharashtra, Jalindar Shamrao Jadhav (42), Moh, Maharashtra

aser Ramdas Tanaji Khandare (37), Howrah, West Bengal nung ta jangjaogo.

Police-i parnok ket nungi hydraulic machine, NOMAN melting machine, 94 graphite crucibles, tongs, carbon rods, nitric acid, SPICA hydraulic power pack, carbon rod holders, aser MASTECH AC/DC clamp meter osettem ngutetogo.

## Opposition-i shilem magiba Venezuelan election Maduro-i akok



**Caracas, Monupii/May 26 (Agencies):** Venezuela nung opposition temi shilem magiba parliamentary aser regional elections nung Tir Nicolas Maduro'er party-i takok nguogo.

Hombarnü National Electoral Council (CNE) ajanga preliminary results sayaba nung National Assembly asoshi Deobarnü vote agütsüba shilem 82.68 shi United Socialist Party of Venezuela (PSUV) aser par allies temi ngur liasü.

Iba tetetzü attorney general indang office aser linük nung tematiba court indang züngsemtem densema sorkar nung tashi tongtipang tem par party-i anishitsü, shirnok menden 285 aliba assembly ajanga shimer.

CNE ajangasa ashiba agi state governor menden 24 nungi menden 23 ya sorkari nguogo, koba opposition asoshi tejashitsü lir, kechiaser taoba mapang par ket nung menden pezü liasü.

Election turnout ya 8.9 million mesüra vote agütsütsü temsüa aliba nisung 21 million nungi sholem 42 shi asütsü. 2021

elections nunga kasaji liasü, ta CNE chief Carlos Quintero-i ashi.

Ajisüaka linük indang opposition tongtiba lenirtemi voters dang July ita 2024 presidential election mechi longkak aita election nung shilem magitsü ayongzüka liasü. Opposition temi iba election nung takok angu ta ashir, saka ketdangsür temi Maduro-i takok angu ta sangdong.

Opposition lenir Maria Corina Machado-i Deobar aonung social media X nung ashiba agi, linük tesem kar nungbo vote agütsütsü temsüa alir shilem 85 shi vote magütsüdaktsü, aser ibaji taoba küm election nung tamakok ajuruba miimbangtsü merangba tashi tulu lir.

Ajisüaka Maduro-ibo opposition temi shilem magiba memetet amai yutsü.

"Opposition tem wadang nungi ainshidang, asenok aor aser tenem-longren agir," ta pai ashi.

Venezuela indang yimti tulutem nung vote agütsür kanga ajema liasü, ta

osangbener aser social media posts ajanga ashir. Ajisüaka sorkari party ajanga noksa tem lemsatepba nungbo Trujillo aser Amazons amala tesemtem nung nüburtem vote agütsütsü nokdaktepa liasü.

Deobarnü vote agütsüba ketdangsütsü asoshi security agents 400,000 dak tema yoka liasü aser nisung 70 dak tema apu.

Item rongnung opposition züngsem tanishir Juan Pablo Guanipa densema liasü, shiba vote agütsüba nung timtem agütsütsü sentong nung "terrorist network" ka anir liasü ta tai tongloksür apu.

Sen yong mapa tamajung inyaker nisung aika Colombia nungi linük telungi aitogo ta sorkari sangdonga election metembang tashi kidanger den kanga mazüngi aliba arütsü shibang.

Latin America nung kanga benboa aliba linük, Venezuela nung küm aika junga ketdang masüba aser linük balalai temerenshi agütsüba ajanga rongsenketzüng jenjang mejungi kumaka Maduro-i elections nung takok angu.

Tawa ang US Tir Donald Trump-i totzü atsüba Chevron dang Venezuelan crude maneni atsütsü temelaba agüja aliba agientsü, anungji Maduro indang administration asoshi tongtipang economic lifeline ka nung kongshir.

Washington-isa US nungi Venezuelan migrants 350,000 indang deportation protection agientsü aser dangar noklang aika El Salvador nung aliba maximum security prison kati yok.

## Russia-i tayimtsü amshia Ukraine amak

**Washington, Monupii/May 26 (Agencies):** Ukraine nung rara tenzüker Moscow-i tayimtsü amshia tesashitiba maka nisung 13 shi tepsetba sülen United States Tir Donald Trump-i Russia Tir Vladimir Putin aitsü.

Trump-i iba indang o ya pa indang Truth Social sapang nung Deobar aonung ashi, koba Putin arütsüba ka alitsü.

"Ni Russia indang Vladimir Putin den teti tesendaktep tajung lia arur, saka pa dak langka kar atalok. Ya YAR kümogo!" ta US tiri zülü.

"Pai Ukraine shilem tilaka kisüng masü ajunga aginer ta ni teti shia arur, aser aji shidak ta kuli sayur südi, saka pai yamaji aginüra, ibaji ajanga Russia laotsü!" ta pai ashi.

Honibar aonung aser Deobarnep Ukraine nung otsü yanglua Russia-i drones yok, ta Ukraine indang Air Force ajanga ashiba sülen iba o ya Trump-i ashi. Russia sepaitemi drones 298 aser missiles 69 yok saka drones 266 aser missiles 45 khazüka yoktet, ta parnoki ashi.

Danga mapang amakdak nisung timba tepsetaka hadir khaloktsüba tsütsü ibai tesashitiba liasü.

Deobarnü linük tesem ajunga nung taoksa aser tetsübo agi sünger liasü, aser asürtem ya linük northwest tsütsü Zhytomyr region nungi arishi küm ti, 12 aser 17 tain densema lir, ta region ketdangsür temi ashir.

Nisung 60 dak tema yiru.

"Russia lenirtem dang asangsang nung tajungshiba tesashi ka melira, iba azüdokshi tazü mapa ya manentettsü," ta Ukraine Tir Volodymyr Zelenskyy-i social media nung ashi.

"America nunger ola madokba, alima nung dangartem ola madokba ajanga Putin dang ajungmesor. Sanction ajanga dang yahritsü," ta pai ashi.

Trump-i Putin dang tezü atangba aser küm asem dak tema rara manentetba asoshi ola tali adoka akumer, koba US leniri linük tir kumer anogo ishika tsüngta bentettsü nangzüka lir.

Pai mapang talangka nungi Putin den tesendaktep tajung lir ta asükuma jembia aru aser yimjung tezüngzüktep ka yanglutsü asoshi Ukraine dang nungi Russia-i temulungba ta aiben shia lir.

Ajisüaka Deobarnep Trump-i Russia tir dang aremzüka samatar ta jangja-jangja shia liasü.

"Putin-i kechi inyaker, yangji ni mepelar. Pai nisung aika tepseter. Aser Putin dak kechi asüar ni memetet," ta Trump-i northern New Jersey nungi aodang osangbener dang ashi.

"Mapang talangka nungi ni pa meteta lir, aser pa den teti tangatettep nung aru, saka pai yimtitemi rockets yoker aser nisung tepseter, aser ni aji maginer."

Russia nem temerenshi tali agütsütsü bilema lir asü, ta asüngdang dang, "Temetetba," ta Trump-i langzü.

## Israel-i Gaza nung nisung 30 tepset

**Cairo, Monupii/May 25 (Agencies):** Israeli military-i Deobarnü Gaza kübok tesem balala amakba sülen rescue service ketdangsür tejen ka aser osangbener ka densema nisung 30 tepsetogo, ta local health ketdangsürtemi metetdaktsü.

Israel-i south len Khan Younis, north len Nuseirat aser central Gaza Strip amakba sülen item nisungtem ya tepsetogo, ta medics-i ashi.

Parnoki ashiba agi, Jabalia nung local osangbener Hassan Majdi Abu Warda'er ki anüng ajanga Deobar anepdang amakba sülen pa aser par kinungertem tepseta liasü.

Nuseirat nung tesem ka amakba mapang civil emergency service indang ketdangsür tejen Ashraf Abu Nar aser pa kinungtsü par kidang tepseta liasü, ta medic temisa shisem.

Hamas-i achaayangba sorkar media office sangdong ka ajanga ashiba agi, Abu Warda asüba densema Gaza nung 2023 küm October ita

nungi Palestine nunger osangbener 220buba süogo.

Israel military-i sangdong ka ajanga ashiba agi, Eyal Zamir chief of staff-i Deobarnü Khan Younis nung sepaitem semdangogo aser parnok dang iba ya tatembang makaba rara ka masü aser Hamas pur command aser control densema asset timba samatokogo, ta shia liasü.

"Tepuokertem kidangi meyipa anir arutsü asoshi onok ket nung akaba hadir ajak amshitsü, Hamas pur samatsütsü aser parnok yimsüsüba adongsatsütsü," ta Zamir-i ashi.

Deobarnü menor International Committee of the Red Cross ICRC-i ashiba agi, parnok indang staff Ibrahim Eid aser Ahmad Abu Hilal na Honibarnü Khan Younis nung ki ka amakba mapang tepsetogo.

Kasa mapang nung Gaza media office-i ashiba agi, Israel nunger sepaitemi Gaza Strip shilem 77 amokbanger lir.

Hamas indang armed wing aser Islamic Jihad-i Deobarnü

sangdong ka ajanga ashiba agi, parnok sepaitemi bomb aser anti-tank rocket tem amshia Gaza kübok tesem balala nung mendana atar Israel nunger sepaitem makogo.

Hokolbarnü Israel indang military-i ashiba agi, parnoki manger mesangwa tsüngda Gaza nung tesem 75 makogo, kong prangbong injang aser rocket launcher tem bendena ayuba tesem amakba densema lir.

2023 küm October ita 7 nü Hamas puri arrtsü adener Israel maka nisung 1200 tepsetba sülen Israel-i meyiper Gaza amak tenzüker aser tang tashi nung Palestine nunger 53,900 dak tema tepsetogo.

## North Korea-i ketdangsür tejen pezü apu

**Pyongyang, Monupii/May 26 (Agencies):** Warship tasen ka lunch asüba tamakok anguba sülen North Korea-i ketdangsür tejen pezü puogo. Iba tamakok anguba yagi linük lenir Kim Jong Un kanga mepelar.

Ruling Workers' Party's Munitions Industry Department indang deputy director Ri Hyong-son makümba ajanga taoba hopta iba rong ya kanga mejungi tsükoka liasü, ta KCNA-i Hombarnü metetdaktsü.

5,000-ton destroyer indang hull raksaogo aser Kim-i ashiba agi, iba ya "criminal act" ka aser iba ajanga linük meraket kanga mejungi raksatsüogo.

Iba rong ya mongintem telok ka tawabangba kübok tang yanglushidar, ta KCNA-isa metetdaktsü.

Ri, shiba party indang Central Military Commission nung shuilem ka lir, pa ya iba tatalokba dak sendakba nung

apuba ketdangsürtem rongnung ajak dang temaba jenjang nung aliba ketdangsür lir.

Commission yagi Korean People's Army command asür aser North Korea indang military policy yanglua benoker.

Hopta tatemi Pyongyang-i north len Chongjin shipyard nung ketdangsür asem puogo, kong destroyer ya yanglu aser lunch asütsü tamakok ngua liasü.

Ketdangsürtem rongnung chief engineer ka, construction tekolakba aser administrative manager ka densema liasü.

Kim-i Bodhbarnü, iba lendong ya mekümdangba ajanga atalokba lir ta shiogo.

Item ketdangsürtem ya koma merenshitsü ajibo mejangja, saka yimya agi aibelena aliba ngutetba ketdangsürtem mapa inyakdakja kanga mejungi merenshir aser iba den karbo tasüba agi dena merenshir.

| GOVERNMENT OF NAGALAND                                                                                                                                                                                    |                               |                                                                       |
|-----------------------------------------------------------------------------------------------------------------------------------------------------------------------------------------------------------|-------------------------------|-----------------------------------------------------------------------|
| DIRECTORATE OF TECHNICAL EDUCATION                                                                                                                                                                        |                               |                                                                       |
| NAGALAND : KOHIMA                                                                                                                                                                                         |                               |                                                                       |
| DTE/ESTT-24/2020-21/                                                                                                                                                                                      |                               | /Dt. Kohima the 26th May 2025.                                        |
| CORRIGENDUM                                                                                                                                                                                               |                               |                                                                       |
| In partial modification to this Department's Notification of even number dated 23rd May 2025 the eligibility criteria for the under mentioned post maybe read as given below and not as notified earlier: |                               |                                                                       |
| Sl. No.                                                                                                                                                                                                   | Name of the Post with subject | Minimum Eligibility criteria                                          |
| 2                                                                                                                                                                                                         | Lecturer in Mechanical Engg.  | B.E / B.Tech. with minimum 1st class/1st division in Mechanical Engg. |
| Other requirements and conditions shall remains the same.                                                                                                                                                 |                               |                                                                       |
| (Er. VIPULHOU LHOUNGU)<br>Director                                                                                                                                                                        |                               |                                                                       |

## Nagaland Wrestling Association (NWA) team ki tonga aruogo



Dimapur Airport tonga aruba sülen Team NWA tangokba noksa nung angur.

**Kohima, Monupii/May 26 (TYO):** Nagaland Wrestling Association (NWA) Team Hombarnü ki tonga aruogo. Iba team yagi otsüsütsüsa Asian Belt Wrestling Alysh Championship 2025 nung medal aika ngua liasü. Iba asayamung ya Delhi nung May 21 nungi 26 tashi asaya liasü.

NWA Media Cell sangdong ka ajanga ashiba agi Team India-i iba asayamung nung

silver 2 aser bronze medal 7 angu kong Team NWA-i silver ka aser bronze medal 5 anguba densema liasü, koba tang mezüngbuba international asayamung ka nung medal aika anguba liasü.

Team NWA nungi asayar 15, UWW nominated Referee ka, fresh observation Referee ka aser ketdangsür 7 Team India nung densema liasü.

NWA-i senotsü aser logistic teyari agütsüba atema

Nagaland sorkar dang pelaba lemsatepba den Directorate of Youth Resources & Sports (YR&S)-ia senotsü agi yariba aser Chief Conservato of Forest, Durg Circle Dr. Keneilhouthoulie Miachio-ia Team NWA chiongi jaokba atema kanga pelaba lemsatepba liasü.

NWA-isa, wrestling asaya meimertemi lenla balala ajanga team nongita yariba atema kanga pelaba lemsatepogo.

## Mbappe-i tang mezüngbuba European Golden Shoe award nguogo



**Monupii/May 26, 2025 (Agencies):** Honibarnü Real Madrid puri goal 2-0 agi Real Sociedad akokba asaya nunggoal ana idaktsüba sülen Kylian Mbappe-i tang mezüngbuba European Golden Shoe award nguogo.

France nunger asayar yagi Spain nung mezüngbuba asayaba küm league goal 31 idaktsü aser iba tetezü pa La Liga nunga goal timtiba idaktsüba asayar liasü.

Real pur tang asaya aliba season nung tatembangbuba

asaya nung goal ana idaktsüba sülen pa Sporting striker Victor Gyokeres (39 goals) aser Liverpool forward Mohamed Salah (29 goals) na jakdang liasü.

Gyokeres-i Mbappe dang nungi goal ti timba idaktsü, saka pa tanabuba jenjang nungang tembang, kechiyong weighted-points based system kati ranking ya telemtetba agir.

Europe nung top five leagues - Premier League, La Liga, Bundesliga, Serie A aser Ligue 1 nung asayaba asayartem idaktsüba goal ji point ana angur.

Portuguese Primeira Liga densema rank trokbuba nungi 22buba tashi nung aliba league tem nung asayartem idaktsüba goal ji point 1.5 lir.

Iba award angutsü atema Mohamed Salah-i Liverpool pur Premier League nung Deobarnü Crystal Palace den asayaba mapang goal asem idaktsütsü nüngdaka liasü.

Egypt nunger asayar yagi goal 1-1 agütsür tembangba asaya nung goal ka idakja liasü.

Hugo Sanchez (1989-90) aser Cristiano Ronaldo (2010-11, 2013-14 aser 2014-15) na sülen Mbappe ya Real nungi iba award anguba asayar tasembuba kümogo.

Gyokeres, shiba lemluwa Arsenal-i aotsü sendaktepa arudar, pai Mbappe meneptsü kecha maongka maliasü, kechiyong Sporting indang league campaign taoba hopta tatemi tembangogo.

Deobarnü Portuguese Cup final nung Benfica goal 3-1 agi akoba asaya nung goal idaktsüba sülen Sweden nunger international asayar yagi tetoktepba ajak nung asaya 51 nung goal 53 idakja liasü.

Goal timtiba idaktsüba asayar pongu: Mbappe (62 points), Gyokeres (58.5), Salah (58), Robert Lewandowski (54), Harry Kane (52).

## French Open: Alcaraz aser Ruud na tanabuba round-i iogo

**Paris, Monupii/May 26 (Agencies):** Hombarnü French Open tebur kija asaya nung Carlos Alcaraz-i Italy nunger qualifier Giulio Zeppieri 6-3 6-4 6-2 agi koka tanabuba round-i iogo.

Defending champion yagi Roland Garros stadium nung Suzanne Lenglen court nung world number 310 asayar ya mapang magi dang akok aser pa tanabuba round nung Hungary nunger asayar Fabian Marozsan den asayatsü.

"Kanga junga asayaogo. Grand Slam nung mezüngbuba round ya temela masü asür talisa idaki defending champion

ama asayatsüji temela masü," ta Alcaraz-i ashi.

"Ni junga asaya tenzük aser asaya tepeyong pace meraksai asayaogo, ni kü asaya nung rangloker asayatsü merang. Ni Roland Garros junga asaya tenzüktetba atema ka nema danga bilemer," ta paisa shisem.

Mezüngbuba set nung 3-1 aliba mapang Alcaraz-i Zeppieri indang serve break asü aser asaya koka liasü. Tanabuba set nungbo Zeppieri-i pa nem ayong ayongabo mekokdaksü, saka game tenetbuba nung Alcaraz-i serve ka break süa pai asaya akok. Tasembuba set bo pai timtem kangabo meli koka liasü.

Kasa asayamung tebur kija asaya nung Casper Ruud-i Spain nunger asayar tejen Albert Ramos Vinolas 6-3 6-4 6-2 agi kokogo.

Ruud ya Roland Garros nung masaya tsüngda Norway nunger rongnungi Masters 1000 title ka abenba mezüngbuba asayar aküm. Pai iba ita Madrid Open koka liasü.

Ruud-i 2022 aser 2023 küm Paris nung final tonga asayar lir aser pa asoshi clay court nung asayatsü ya tayongba aser idaki takok tajungba ngua arudar.

Pa taruba asaya Portugal nunger asayar Nuno Borges den asayatsü.

## Taoba Man Utd manager Ten Hag Leverkusen coach kümogo

**Monupii/May 26, 2025 (Agencies):** Taoba Manchester United coach Erik ten Hag-i German club Bayer Leverkusen den küm ana atema tenangzüktepba yangluba sülen pai head coach ama Xabi Alonso melenogo.

Taoba küm October ita United toktsüba sülen arishi küm 55 tain Ten Hag tang mezüngbuba club ka nung inyaksü lir. Alonso ya Deobarnü Real Madrid indang head coach kümogo.

Ten Hag United nung küm ana dak tema inyakba mapang pa lenisüba nung team-i Carabao Cup and FA Cup akok saka Premier League nung United pur jenjang 14buba nung aliba mapang pa mapa nungi anenja liasü.

2022 küm United nung maden tsüngda pa Ajax nung kanga takok ngua inyaka liasü.

Leverkusen sporting director Simon Rolfes-i ashiba agi, Erik ten Hag ya tajangshiba aika bener aliba coach ka aser pai takok tajung aika ngutetogo.

"League title asem den domestic cup ana koka pa aser

Ajax-i 2018 nungi 2022 küm tashi nung Dutch football amokbanger asaya liasü."

"Manchester United nung tinyaktsü kanga tasakba mapang ka nung Erik-i coach ka ama pa sempet sayua inyaka takok ngutetogo," ta paisa shisem.

Taoba Liverpool midfielder Alonso lenisüba nung Leverkusen puri 2023-24 season nung league aser cup anaprongla koka liasü.

Taküma parnok Bundesliga nung tanabuba jenjang nung tembanga liasü. Parnoki champions Bayern Munich point 13 agi memenep.

Ten Hag shibai mapa ya July 1 nü nungi officially agizüka inyaksü pai ashiba agi, Leverkusen ya Germany nung club tajungtiba rongnung ka aser Europe nunga temaba jenjang nung aliba club ka lir.

Paisa, "tawa takok anguba maneni bener aotsü atema ni Leverkusen-i aru. Iba ya tayongzükbaba jangrademtsüka aser longjemer temelenshi mapang ka nung team tajung ka tentettsü yongya atar," ta ashi.

## Troy Cooley India A bowling coach kümogo



**Mumbai, Monupii/May 26 (Agencies):** Troy Cooley ya India A team bowling coach kümogo, shirnok asaya asem atema Deobarnü England tongogo. Cooley ya BCCI indang Centre of Excellence (CoE) nung bowling coach lir.

2005 küm mapang talangka lir Ashes akokba mapang Cooley ya England team indang bowling coach liasü. Arishi küm 57 tain coach ya 2021 küm nungi BCCI indang National Cricket Academy, Bengaluru nung fast bowling coach lir.

Pa ya 2022 küm February ita South Africa nung T20 World Cup asayaba mapang India tetsür team bowling coach liasü.

Hrishikesh Kanitkar India A team head coach lir, koba BCCI-i May 16 nü sangdonga liasü. Abhimanyu Easwaran-i aniba India A team ya Kanitkar lenisüba nung asayatsü aser

parnok England nung asaya asem asayatsü kong India Senior tem den asaya ka asayatsüba densema lir.

India A squad nung asayar 18 aliba nungi England-i moi aliba asayar tanungbatem Hombarnü apusoa aotsü imlar. Mezüngbuba four-day match koba first-class game ama züngshir iba asaya ya England Lions den May 30 nü nungi tenzüka Canterbury nung asayatsü.

June 6 nü nungi tenzüka Northampton nung tanabuba four-day game ya asayaba sülen India A team Beckenham nung June 13 nungi 16 tashi India Senior team den closed-door intra squad match ka asayatsü.

Shubman Gill aser Sai Sudharsan na England Lions den tanabuba asaya masaya tsüngda India A team nung adentsü.

## BILEMDANGANG

"Nai na koma benshidaktsüner yamaji tangar danga benshiang."